

## O PITANJU PRIVATNE PRAKSE U GEODETSKOJ STRUCI

Na Plenumu Saveza GIG-a BiH od 20.12.1967.godine pored ostalog diskutovano je i o privatnoj praksi u geodetskoj struci.

Zapravo ovo pitanje je Predsjedništvu postavila nekolicina kolega koji su zainteresovani za ovaj vid djelatnosti. Odmah da naglasim da je Plenum zauzeo stav onakav kakav je zauzeo i Kongres GIG-a Jugoslavije održan u Portorožu. Stav Kongresa je da u našoj zemlji, a takodje i u BiH, ima dovoljno geodetskih kadrova i da su oni u stanju da izvršavaju sve geodetske zadatke. Plenum se i danas slaže sa ovim stavom i dodaje da je u ovim uslovima potrebno izvršiti izvjesne organizacione promjene u službi - kako bi ona mogla udovoljiti rastućim potrebama društva.

I pored ovog stava Plenum smatra da o ovom pitanju treba i dalje diskutovati. Slijedeći Kongres GIG-a Jugoslavije trebaće o tome da zauzme stav s obzirom na izvjesne promjene koje je usloвила društvena i privredna reforma. Ovo pitanje traži jednu svestraniju analizu sa stanovišta društvenopolitičkog i ekonomskog aspekta te stvarnih zadataka koji stoje pred geodetskom strukom i službom.

Iako po ovom pitanju postoje veoma oprečna mišljenja smatram da po njemu treba voditi diskusiju u okviru naših stručnih udruženja - podružnica, gdje ćemo čuti veći broj članova i doći do daleko kvalifikovanijih mišljenja i prijedloga.

Zatvaranje ovog problema u uske krugove i grupe, te sakupljanje potpisa po nekim radnim organizacijama od strane zagovarača privatne prakse može ~~se~~ na koncu da dovede do nepotrebnih <sup>r</sup>repzlika.

Nema sumnje da će naše podružnice i članstvo ne samo podržati - već biti njegov nosilac ukoliko taj prijedlog bude išao u prilog razvoja geodetske struke naše socijalističke zajednice.

Pošto sam čuo neke diskusije od zagovarača privatne prakse i osnivanja udruženja privatnih geodetskih stručnjaka, mogu da kažem da neke diskusije u potpunosti odudaraju od suštinskog sagledavanja načetog pitanja.

Pitanje privatne prakse i potrebe za njom ne može se sagledati golim upoređivanjem privatne prakse u nekim uslužnim djelatnostima sa privatnom praksom u geodetskoj struci. Geodetski poslovi ne samo da su poslovi od opšteg interesa već oni imaju veoma širok tretman s obzirom na velike potrebe društva uopšte za geodetskom strukom.

U procesu privredne reforme došlo je do izvjesne stagnacije u pogledu zapošljavanja u našoj struci, međutim, ta je pojava uočena i u drugim strukama. Naime, i mi imamo pojavu zatvaranja radnih organizacija u vlastite okvire i to naročito pred tek školovanim kadrom. Činjenica je da problem onih nezaposlenih ne bi bio riješen otvaranjem privatne prakse - kako to tvrde oni koji ju zagovaraju.

Bez obzida što su za privatnu praksu momentalno uglavnom zainteresovane neke kolege koji su u penziji ili su neposredno pred penzionisanjem, ovo pitanje treba svestranije analizirati i sagledati. Ukoliko Kongres eventualno na njega da pozitivan odgovor, takvom vidu djelatnosti treba dati takvu zakonsku podlogu koja će ga u potpunosti izjednačiti sa radnim geodetskim organizacijama kako u pogledu propisa tako i u pogledu društvenih obaveza.

Nedavno doneseni "Zakon o premjeru i katastru zemljišta" SR Srbije sankcionišući već postojeća nakolika slučaja, toliko je anahroničan da sigurno ovakav neće naići na podršku šire geodetske javnosti.

Smatram da po ovom pitanju treba konsultovati što veći broj kolega kako bismo do Kongresa imali jasan stav našeg članstva.

Na kraju, Ustavi SFRJ i SRBiH, te Program SKJ i politički stavovi sadržani u materijalima Šestog kongresa SSRNJ daju nam platformu za potpunije sagledavanje svih aspekata ličnog rada u uslovima razvijanja socijalističkih društvenih odnosa na samoupravnim osnovama.

Ing.Vladimir Lukić

#### UMJESTO INFORMACIJE....

Zamoljen od Urednika da dadem informaciju o osnivanju Udruženja samostalnih geodetskih stručnjaka Jugoslavije u Beogradu nalazim da je umjesto te informacije najbolje da se objavi pismo Udruženja koje je 12.8.1967.godine pod brojem 1 dostavljeno Saveznoj geodetskoj Upravi Beograd, a koje doslovce glasi:

"Dana 15.jula o.g. održana je u Beogradu osnivačka skupština samostalnih geodetskih stručnjaka, na kojoj je donesen zaključak, da se osnuje Udruženje samostalnih geodetskih stručnjaka Jugoslavije. Na skupštini je izabran Glavni odbor Udruženja.

Postupajući po postojećim propisima, inicijativni odbor je zatražio upisivanje Udruženja u registar udruženja, pa je Savezni sekretarijat za unutrašnje poslove rješenjem svojim B-3. Br.0230-138/1 od 19.jula 1967.g. upisao Udruženje samostalnih geodetskih stručnjaka Jugoslavije u registar udruženja, čije je sjedište u Beogradu, a odobrena djelatnost na teritoriji cijele zemlje.

Na prvoj sjednici Glavni odbor Udruženja donio je zaključak da naslov osim prednjega informira još o slijedećem:

Udruženje će se u smislu usvojenih pravila Udruženja posebno starati za održavanje uskog kontakta i saradnje sa odgovarajućim državnim organima.....